

△賀新郎▽

睡起晨光好，  
對西山、高窗遠覽，  
燕輕風嫋。  
閒步田園悠然意，  
思欲孫登長嘯。  
更一片、清溪綠草。  
肯負青春如流水，  
獨尋歡貪戀桃花小。  
觥滿引，寫新稿。

平生唯願家鄉老，  
喜雛鶯、竹敲雅韻，  
共成宮調。  
可嘆多情常離別，  
堆積相思難表。  
河漢淺、纖雲弄巧。  
自舞自歌憐瘦影，  
漸更深夜靜幽人悄。  
薄霧起，月斜照。

△憶江南▽

追往事，  
相對笑疏狂。  
曾踏花東誇稚少，  
也歌詩酒向東窗。  
煙雨正茫茫。

傷流景，  
碧樹嘆蒼蒼。  
小院寒蛩啼破葉，  
西風歸雁立斜陽。  
雲淡遠山長。

△臨江仙▽ 元宵

七彩琉璃光遍徹，  
小橋水舞疏煙。  
錦衣鐘鼓盡情歡。  
幽香傳笑語，  
屢聳作詩肩。

瞬息浮生哀樂續，  
團圓又是明年。  
風霜十載轉朱顏。  
夜涼清露重，  
人散斷雲閒。

△踏莎行▽ 悼亡

春夜披星，  
秋晨踏霧，  
陋居瓢水飢無薯。  
日高笠破烈難遮，  
歲寒猶把牛衣補。

寸草傷暉，  
北風搖樹。

淒涼腸斷誰憐顧？  
今朝痛哭廢詩篇，  
人生如夢還如露。

註：詩廢蓼莪